

PAOT TE KŌMĒN TEXANŌN YŌG TIKMŪ'ŪN PU TAPPET KAX'ĀMI I

1 ¹Ūgmŭn Paot. 'Āte' kax'āmi nŭhŭ' tappet, yā 'āxop pu kax'āmi!, yā Kunnix kopa kuxa mām xop pu' kax'āmi kŏmĕn Texanŏn tu!, yā yŭmŭg 'Ātak Topa yŏg xop pu!, yā yŭmŭg xuxyā Yeyox Kunnix yŏg xop pu' kax'āmi!. Xinax te 'āxop pe'paxex xix Tīmŏn te' kamah. Pu yā Topa xa hāmmaxnā!, xayīy 'ākuxa mām.

'Āxop kuxa mām Topa kopah

²Ūgmŭ'āte Topa pu hām'āktux mŏkumak mŏg, hu: "Kunnix kopa kuxa mām xop pu 'āmax." Kaxīy. Yā 'āxop pu' max Topah. 'Ūgmŭ'āte Topa pu 'āxop 'āktux mŏkumak mŏg. ³Hamŭn, 'ŭgmŭ'āte yāy 'Ātak Topa pu hām'āktux, tu hāmpe'paxex, 'āxop kuxa mām ka'ok, hu hāpxopmā max xohix. 'Āxop te' nŏy putup pax, hu 'āxop te hāpxopmā max punethok. Xate yŭmŭg xuxyā Kunnix hip kumaknāg. Hā kaxīy yŭmŭ'āte hāmpe'paxex, tu Topa pu hām'āktux. ⁴Ūkxape xop, Topa te 'āxop putup pax, tu tikmŭ'ŭn xohix kopa 'āxop yīmŏgātux, tu 'āxop mīy Topa yŏg tikmŭ'ŭn xe'!. Hā kaxīy 'ŭgmŭ'āte pe'paxex, tu Topa pu hām'āktux. ⁵Hŏmā 'ŭgmŭ'āte xa Topa yŏg hām'āpak max'ax 'āktux. 'Ūgmŭ'āte nŏm 'āktux, tu hāpxopmā ka'ok xe'ēgnāg, tu Topa Koxuk mŭtik xa Topa yŏg hām'āpak max'ax 'āktux, tuk mŭg kuxa mām ka'ok Topa yŏg hām'āpak max'ax kopah. Hŏmāg mŭg tihi 'āxop kopah, ha xatek mŭ yŏg hāpxopmā max'ax pĕnāhā!, yāg mŭn max xa!. ⁶Xate 'ŭgmŭg max pĕnāhā!, xix yŭmŭg xuxyā Yeyox yŏg, tu nŏ! max putuk. 'Ūnŏy te 'āxop kute'ex kummuk, pa 'āxop te Topa yŏg hām'āpak max'ax paha!, tu 'ākuxa hittup, yā Topa Koxuk te 'ākuxa hittupmāhā!. ⁷Āxop max, ha 'āmax pĕnāhā Kunnix kopa kuxa mām xop te hāpxexka Māxenŏn tu!, xix hāpxexka Genex tu!, tu nŏ! max kamah, yā 'āxop putuk. ⁸Hamŭn, 'āxop te yŭmŭg xuxyā Yeyox 'āktux hāpxexka Māxenŏn tu!, xix hāpxexka Genex tu!, yā! xohix yīmap te' yŭmmŭg, 'ākuxa mām ka'ok. Putep nŏy 'āktux putup 'ŭgmŭ'āte'? Puxi!. ⁹Hŏmāg mŭg tihi 'āxop kopah, ha 'āxop te topa komut xop nīm, tu ta Topa xe'le pe 'āmŏg, ha tikmŭ'ŭn xohix te 'āyīmap te' xupak, tu hām'āktux. ¹⁰Xate Topak-tok hip, Yā

pekkox tu yīxop-tup Topak-tok. Hōmã Topa te yāy kutok Yeyox putpu' hīnnãhã'. Yeyox te yūmūg mōy putup, 'ihã Topa gāy 'ūkummuk xop mūtik.

Paot te hāpxopmã max kōmēn Texanôn tu'

2 ¹Ūkxape xop, hōmãg mūg tihi 'āxop kopah, tu hāpxopmã max, 'ap kummuk mīy'ah, 'a yāg mūg hitop ti'ah 'āxop kopah. ²Hōmã tikmū'ūn tek mūg kute'ex kummuk komēn Pinio tu', tuk mūg mǎnōg, pa hāpxip 'ihāg mūg mōg, tu mōktu 'āxop tuk mūg mōxaha 'onte kōmēn Texanôn tu', ha kōmēn Pinio yōg tikmū'ūn tek kute'ex kummuk, 'āxop te' yūmmūg. Pa yūmū yōg Topa tek kuxa hittupmãhã', ha 'āte Topa yōg hām'āpak max'ax 'āktux. ³Ūgmū'āte Topa yōg hām'āpak max'ax 'āktux, tuk mū'āte pe'paxex kummuk 'ohnāg, tuk mū'āte 'ōg hāpxop xak 'ohnāg, tuk mū'āte 'āxop kupex 'ohnāg. ⁴Ūgmū'āte putep mūn 'āktux? Topa te nō putup, 'ūgmū'āte nōm 'āktux mōkumak mōg. Hamūn. Topa tek mūg putup, tuk mū'ā Topa yōg hām'āpak max'ax hōm, tuk mūg mō'pok, ha 'āte tikmū'ūn xohix pu nōm 'āktux. 'Ūgmū'āte putep mūn 'āktux? 'Ok pe tikmū'ūn te nōm putup pax hām'āktux? 'Ok pe Topa te nōm putup pax hām'āktux? Yā tikmū'ūn yōg'ah, pa Topa tek mū yōg putup'ax kopit. ⁵Āxop te' yūmmūg. Hōmãg mūg tihi 'āxop kopah. 'Ak mū'āte xa hã xape komut'ah. 'Ūgmū'āte 'āxop kupex 'ohnāg. 'Ok 'ūgmū'āte hām'āktux max, pa 'ōg hāpxop putup? Āmhok. 'Ak mū'āteputup'ah 'ōg tayūmak. Topa te' yūmmūg. ⁶'Ak 'ūgmū'āteputup'ah, puyīy tikmū'ūn 'ūgmūg 'āktux max. 'Agmū'āte 'ōg hām'āktux max xak 'ohnāg, xix tikmū'ūn nōy yōg kamah. ⁷Ūmax, pu Kunnix yōg mō'pok xop tikmū'ūn yōg hāpxop xak, pak mū'āte nōm hã xak 'ohnāg, 'a' xat'ax xop putuk'ah, pak mū'āte xa' hāpxop popmãhã', yā 'ūn tek-tok pu' popmã'ax putuk. ⁸Ūgmū'āte 'āxop putup pax, hu xa Topa yōg hām'āpak max'ax 'āktux, xix 'āxop pu yāy mūn popmãhã, yāg mū'āte 'āxop ka'ogãhã'. ⁹Hamūn, 'ūkxape xop, xate' yūmmūg. Hōmãg mūg tihi 'āxop kopah, tuk mū'āte hāpxopmã max punethok. Māyōn mōg tox hāg mūg hām, xix 'āmnīy hã, nūy pop hok 'ōg hāpxop xix 'ōg tayūmak, tuk mū'āte xa Topa yōg hām'āpak max'ax 'āktux.

¹⁰Āxop te' pēnãhã', xix Topa te' pēnãhã', 'ūgmū'āte hāpxopmãhã max 'āxop pu', yā Kunnix kopa kuxa mām xop pu'. Yāg mū'āte hāpxopmã max xe'ēgnāg, xix hāpxopmã yok. 'A' hāpxopmã kummuk 'ūm mīy'ah. ¹¹Ūgmū'āte 'āxop xohix hāg tehe', yā 'ātak te yāy kutok hã' tehe putuk. 'Āxop te' yūmmūg. ¹²Ūgmū'āte 'āxop xapit, tu 'āxop kuxa hittupmãhã', tu 'āxop xapit, xayīy hāpxopmã max. Topa te nōm putup pax. Topa te 'āxop yīmōgatux, xayīy Topa yōg tikmū'ūn xop mōkukox, xayīy Topa max xe'ēgnāg pēnã'.

¹³Hōmãg mū'āte xa' Topa yōg hām'āpak max'ax 'āktux, ha 'āxop te' xupak, tu 'āyīpkox pip. Xate' pe'paxex, yā Topa yōg hām'āktux, 'a' tikmū'ūn yōg'ah. Hamūn, Topa yōg. Topa te hāpxopmã max 'āxop kopah, yā' kuxa mām ka'ok xop kopah, ha mōktuk mūg hittup, tu Topa pu hām'āktux, hu: "Āmax. Āmax nōm tikmū'ūn pu!" Kaxīy. ¹⁴Ūkxape xop, hōmã Yoneo xop te Yeyox Kunnix yōg tikmū'ūn xop

xohik-te'ex kummuk hãpxexka Yonex tu', xix 'ãxape xop te 'ãxop kute'ex kummuk kamah, yã' nøy putuk. ¹⁵Hõmã Yoneo xop te yũmũg xuxyã Yeyox putex, tu Topa pupi hãm'ãktux xop kix, ha' xakix, tu ta hõnhã yũmũg kute'ex kummuk kamah. Topa te nõm xop putup'ah. Nõm te tikmũ'ũn xohik-te'ex kummuk. ¹⁶Hamũn, 'ũgmũ'ãte Yoneo xop kũnãpa pip xop pu Topa yõg hãm'ãpak max'ax 'ãktux. Yã Topa yõg hãm'ãpak max'ax te tikmũ'ũn kuxa mãmmãhã Topa kopah, ha Topa te tikmũ'ũn kuxa kummuk xit, nũy kuxa max mõ'tat, 'ũyãnãn tu'. Ha ta Yoneo xop tep-tup, nũy nõm hã hãm'ãktux xuxyã!. Hã kaxiy Yoneo xop te hãpkummuk mĩy xexka!, ha' gãy Topah, tu nõm kopit, nũy yõg kummuk hã yãnãn.

'ũgmũ'ãte 'ãxop xak

¹⁷ũkxape xop, hõmã yũmũg yãy xatat hãpxip kutõgnãg hã. Yũmũg yãy xatat, pak mũ'ãte 'ãxop pekpxax punethok, tu 'ãxop xak nãm, tu 'ã hak mũg mõg putup pax. ¹⁸'ũgmũ'ãte 'ã hak mõg putup pax. 'ũgmũn Paot, 'ã hak mõg putup punethok, pa Hãmgãyãgnãg tek kummugã!, hak mõg 'ohnãg. ¹⁹Yã hamũn, yũmũg xuxyã Yeyox te putpu' nũn putup, 'ihã 'ãxop pip putup Yeyox keppah, tu ta 'ãte hãpxop max hip putup, ha 'ãxop tuk mũg kuxa hittup putup, tuk mũ'ãte 'ãxop 'ãktux xekap-tup, yã xut'ax 'ãktux putup. Yã mõ'tat'ax 'ãktux putup. ²⁰Hamũn, 'ũgmũ'ãte 'ãxop pekpxax punethok, tu 'ãxop tuk mũg kuxa hittup.

3 ¹Hõmã yũmũg yãy xatat, hak mũ'ãte 'ãxop xak. 'ãte yãy xatat hã tot 'ohnãg, huk nox xip kãmãn 'Atãn tu', ²nũy 'ã ha mõ'kutnãhã Tĩmõn, yãg taknõy, yã Topa pu' hãpxopmã max 'ũgmũtik, nũy Kunnix yõg hãm'ãpak max'ax 'ãktux. 'ãte 'ã ha nõ mõ'kutnãhã!, pu 'ãxop mũtik tu hãpxopmã max, xayiy 'ãkuxa mãm ka'ok nõy nã mõg, ³xayiy 'ãxop xe hãpkummuk mĩy hok, tikmũ'ũn te 'ãxop kute'ex kummuk hah. Yã hamũn, xate' yũmmũg, Topa tep-tup, pu tikmũ'ũn yũmũg kute'ex kummuk. ⁴Hõmãg mũg tihi 'ãxop kopah, tu 'ãxop mũtik hãm'ãktux, hu: "Nõm tek mũ'ãk-te'ex kummuk putup." Kaxiy. Yã hãpxip 'ihã tikmũ'ũn tek mũ'ãk-te'ex kummuk. Hamũn. ⁵'ãte' hip'ax hã! tot 'ohnãg, hu 'ã ha mõ'kutnãhã Tĩmõn, pu 'ãkuxa mãm yũmmũg. 'Ok Hãmgãyãgnãg te 'ãmõgãhã?' 'Ok 'ũgmũ yõg hãpxopmã'ax koxyõy? 'ãte' yũmmũg putup.

⁶Ha ta' mõg, Tĩmõn, tu putpu' nũn, tu hãm'ãktux, 'ãkuxa mãm ka'ok Topa kopah, tu 'ãxop te yãy putup pax, xix Topap-tup pax. Tĩmõn te hãm'ãktux, 'ãxop tek mũ'ã hãm'ãktux max, tu xatek mũg pãnãp-tup pax. Hamũn, 'ũgmũ'ãte 'ãxop pãnãp-tup pax kamah. ⁷'ũgmũg xũy, yã nõm tek mũg kute'ex kummuk, pak mũ'ãte 'ãxop yõg hãpxopmã'ax 'ãpak, huk kuxa hittup. 'ũkxape xop, 'ũgmũ'ãte 'ãkuxa mãm ka'ok 'ãpak, tuk mũg kuxa hittup. ⁸Topa yõg putat max hã 'ãxop mõg kuma mõg, kopxik kuxa hittup. ⁹'ũgmũ'ãte Topa pu hãm'ãktux, hu: "ãmax, timũ'ũn pu! Tikmũ'ũn max, kopxik mũg kuxa hittup. 'ãmax. Puxi!" Kaxiy. ¹⁰Hãptup kopxix Topa pu hãm'ãktux xexka xix 'ãmnyĩ, tu hãm'ãktux, hu: "ãpu 'ũgmũg xat, 'ũgmũg mõg tikmũ'ũn hah." Kaxiy. Hamũn, 'ãxop hak mũg mõg putup, nũy 'ãxop pu hãm'yũmmũgã xate nõm yũmmũg 'ohnãg Topa yõg putat max yõg hãpxop.

¹¹'Ûgmũ'átep-tup, pu yũmũg 'Átak Topa 'ãxop tuk mũg mō'pok, xix yũmũg xuxyã Yeyox 'ãxop tuk mũg mō'pok. ¹²'Ûgmũ'átep-tup, xayĩy 'ãxop yãy putup pax nõy nã mōg, xix 'ãxop tikmũ'ũn xohix putup pax nõy nã mōg, ha mōktu 'ãxop tek mũg putuk, yãg mũ'áte 'ãxop putup pax. ¹³Ha mōktu Topa te 'ãxop ka'ogãp-tup, ha 'ãxop maxp-tup, tu 'ãxop max xe'ëgnãg yũmũg 'Átak Topa keppah, 'ĩhã yũmũg xuxyã Yeyox te putpu' nũn putup 'üyãy yōg xop mũtik.

Hãpxopmã'ax max, Topa te nôm putup

4 ¹'Ûgmũ'áte xe hãm'ãktux. Hãg mũ'áte xa' yũmmũgãhã hãpxopmã max, Topa te nôm putup, ha 'ãxop te hãpxopmã max. 'Áte xa hãm'ãktux xix yũmũg xuxyã Yeyox te xa hãm'ãktux, hu: "Ápu hãpxopmã max mĩy nõy nã mōg." Kaxiy. ²Yã hamũn, hõmã yũmũg xuxyã Yeyox tek mũg mō'pok, 'ügmũ 'ãxop pu hãmyũmmũgã'. Xate' yũmmũg. ³Topa tep-tup, xayiy 'ãxop hãpxopmã kummuk kux, nũy ta Topa putuk. Topa tep-tup xayiy 'ãnõy hã xupxet hok. ⁴Ûmax, pu tik yãy pu xetut xax, nũy nôm müy, tu hãpkummuk mĩy 'ohnãg. Tikmũ'ũn max te nôm putup. ⁵Ûkummuk, pu tik yãy putup'ax kummuk hã xetut xax, yã puknõg xop putuk, yã nôm te Topa yũmmũg 'ohnãg xop putuk. ⁶Ûkummuk, pu tik yãy taknõy kute'ex kummuk, nũy yãy pu' xetut xax. Hõmãg mũ'áte xa' hãm'ãktux, hu: "Pa 'ãtix, yũmũg xuxyã Yeyox te nôm kummuk yãnãn putup." Kaxiy. ⁷Topa te yũmũg xat, 'üyiy yũmũ nõy hã xupxet hok. Pa Topa te yũmũg xat, yũmũg hãpxopmã kummuk kux, nũy ta Topa putuk. ⁸Tep te nũ hãmyũmmũgã'ax 'ãpak 'ohnãg? 'Ok tikmũ'ũn yōg hãmyũmmũgã'ax 'ãpak 'ohnãg? 'Ãmhok. Yã Topa yōg. Yã Topa te xa' hõm Topa Koxuk.

⁹'Ok 'áte xa putup pax'ax kax'ãmip-tup, yã Kunnix kopa kuxa mãm xop yōg putup pax'ax? 'Ãmhok. 'A 'áte xa kax'ãmip-tup'ah. Hõmã Topa te xa' yũmmũgãhã', xayiy xohix putup pax, ¹⁰ha 'ãxop tep-tup pax Kunnix kopa kuxa mãm xop xohix hãpxexka Mãxenõn tu!. 'Ápu tikmũ'ũn xohixp-tup pax nõy nã mōg. ¹¹'Ápu hãmyĩmtuk, nũy 'õg hãpxopmã mĩy, nũy ta 'ãnõy yōg hãpxopmã'ax kute'ex hok, nũy ta 'ãhãm, xayiy 'õg tayũmak pi!. Yã hõmã 'ügmũ'áte xa nôm 'ãktux. ¹²Hã kaxiy nôm xop kuxa mãm 'ohnãg Yeyox kopa te 'ãmax pe'paxex putup, ha ta' nõy te 'ãxop hã' te 'ohnãg putup.

Yũmũg xuxyã Yeyox te putpu' nũn putup

¹³'Ûkxape xop, 'ügmũ'áte-tup, xayiy hãmyũmmũg xakix xop yōg hãpxopmã'ax, nũy xakix xop hã 'ãkuxa xũy hok, nũy 'ãpota xexka hok, nũy xate' putuk hok nôm te hãpxop max hip 'ohnãg. ¹⁴Yũmũg kuxa kopa' yũmmũg, Yeyox xok xe'e!, tu putpu' hi!, tu putpu' nũn putup, ha Topa te Yeyox mũtik xakix xop nũnnãp-tup, yã nôm kuxa mãm ka'ok Yeyox kopa xop nũnnãp-tup. ¹⁵Topa Xexka te nôm 'ãktux, hak mũ'áte nôm 'ãktux. Yũmũg xuxyã Kunnix te putpu' nũn putup, 'ĩhã xakix xop putpu' hip-tup, tu' mōg hãmãxap putup Kunnix hah, hak-nãy tu hi xop mōg putup Kunnix hah. ¹⁶Pexkox yōg nü'pok xop yōg xat'ax te' xat ka'ok putup, ha' nõy te Topa yōg mĩxux xop tut kaxyãp-tup, 'ĩhã yumũ

xuxyã Kunnix mûn te pexkox tu' yîxop-tup! Ha ta putpu' hip-tup xakix xop, nõm kuxa mãm ka'ok Kunnix kopah. ¹⁷Hag-nãy tu nõmhã hi xop mōgãp-tup pepix kamah, tu mōktu' xohix yãy tu nũ' nãp-tup hãmgōy xexka kopah, nũy yũmũg xuxyã Kunnix mũtik mōg. Hã kaxiy nõm te Yeyox mũtik tip-tup, tu xe' yãy xatat putup'ah. ¹⁸Ãpu tikmũ'ũn kuxa hittupmã nũ hãm'ãktux hã.

'Åpu Yeyox te putpu' nũn'ax hip

5 ¹Ûkxape xop, hãm 'ũm hã' xip'ax nõm hãpxop? Mō'ãgmũ'ax 'ũm? 'Åmnỹ 'ũm? Putep putuk putup hãpxop xohix, 'ihã putpu' nũn putup Yeyox? Hãm 'ũm hã'? 'Åte' yũmmũg'ah, hu' kax'ãmip-tup'ah. ²Yũmũg xuxyã Yeyox yōg hãptup xupep putup, ha Yeyox te putpu' nũn putup, yã xupxet'ax xupep putuk, 'ihã tikmũ'ũn te nõm hip 'ohnãg. 'Åxop te' yũmmũg. ³Tikmũ'ũn te hãm'ãktux putup, hu: "Yãmyĩptuk nũnte. 'A' hãm xũy 'ũm pip'ah. Yã' max hãpxop xohix." Kaxiy. Pa hãpxip 'ohnãg 'ihã hãm xũy pip mō'ka'ok, tu xohix koxyōy, yã 'ũn tek-tok put xũy putuk, yã' xupep mō'ka'ok. 'Ap nũpap-tup'ah tikmũ'ũn. ⁴Pa 'ãkuxa kopa hãpkoxtap 'ohnãg, hu Yeyox yōg hãptup hip, yã Yeyox te putpu' nũn hip, yã 'ap xupxet'ax xupep'ax putuk'ah xa'. ⁵'Åxop xohix yã kuyãnãm yōg tikmũ'ũn, yã hãptup yōg yã 'ãkuxa tup. Yũmũg mũn 'a 'ãmniỹ yōg'ah, 'a hãpkoxtap yōg'ah, pa hãmyũmmũg. ⁶'Åpu mō yũmũ yōn hok, yã 'ap nõy putuk'ah. 'Åpu yũmũ pa ka'ok, nũy hãmpẽnã', nũy Yeyox hip. ⁷'Åmnỹ 'ihã mō'yōn pax tikmũ'ũn, yã 'ãmniỹ 'ihã paptux xop paptux. Yã' kuxa mãm 'ohnãg xop te kaxiy. ⁸Pa 'ãxop yã hãptup yōg. Pu yũmũg pa ka'ok, nũy hãmpẽnã', nũy Yeyox hip. 'Åpu yũmũ mō'tat kuxa mãm ka'ok'ax xix putup pax'ax. Yã nõm te xonat yōg pipkup hã kep xax putuk. 'A hãpxop kummuk te mō'nãp-tup'ah. 'Åpu yũmũ mō'tat kama Topa yōg hãpxop max hip'ax. Hamũn, Topa te tikmũ'ũn kuxa kummuk xit, nũy kuxa max mō'tat, 'ũyãnãn tu'. Ta nõm te xonat xop yōg pipkup hã kuxxax putuk. 'A hãpxop kummuk te mō'nãp-tup'ah. 'Åpu mō'tat. ⁹Topa te yãy ha yũmũg xãnãhã', nũy yũmũã tu' gãy hok, pa yũmũg xuxyã Yeyox Kunnix hã yũmũg kuxa kummuk xit, nũy kuxa max mō'tat, 'ũyãnãn tu'. ¹⁰Yeyox te yũmũg pupi' xok, 'ũyiy nũ mũtik 'ãti', pe yũmũg pip 'ihã putpu' nũn Kunnix, pe yũmũg xakix, 'ihã putpu' nũn Kunnix. ¹¹'Åpu yãy mũtik hãm'ãktux, pu yĩpkutuk tu nõg. 'Åpu tikmũ'ũn kuxa hittupmã'. Yã xate nõm miỹ nõmhã. 'ãpu 'ãhup hok.

'Åpu hãpxopmã te kaxiy

¹²Ûkxape xop, 'ũgmũ'ãte xa' xak, 'ãpu hãm'ax xupax, nõm te hãpxopmã max 'ãxop kopah. Yã Topa te nõm yĩmōgãtux, puyiy 'ãxop mōgã', puyiy 'ãxop pu hãmyũmmũgã'. ¹³'Åpu nõm hãm'ax xupax xexka'. 'Åpu nõm putup pax, tute hãpxopmã max hah. 'Åpu yãy kix hok.

¹⁴Ûkxape xop, 'ũgmũ'ãte xa' xak. 'Åpu tuknōgnãg xop pu hãm'ãktux, pu tu hãm. 'Åpu 'ũyĩpkutuk xop kuxa hittupmã'. 'Åpu pu'uk xop hã 'ãtehet. 'Åpu 'ũyōg hãpxopmã max hip punethok. ¹⁵'Åpu hãpkummuk miỹ'ax hã

yānān hok. Pa 'āpu tikmũ'ūn pu hāpxopmā max 'āxop. 'Āpu hāpxopmā max mōkuma mōg tikmũ'ūn xohix pu'. 'Āpu yāy pu hāpxopmā max 'āxop.

16 'Āpu yā māyōn mōg tox hā 'ākuxa hittup pax xix 'āmnīy tox hā 'ākuxa hittup pax. 17 'Āpu Topa pu hām'āktux mōkuma mōg. 18 'Āpu hāpxop xohix 'āyīmap 'āktux Topa pu', hu: "Puxi! 'Āmax xohix pu'. 'Āmax." Kaxīy. Hamūn, Topa tep-tup nōm hāpxopmā'ax 'ihā 'āxop mōg Yeyox Kunnix mūtik.

19 Yā Topa Koxuk yōg hāpxopmā'ax kuxyā hok. 20 Hāmpē'āpaxeh hok: "Yā' kummuk, Topa pupi hām'āktux xop te hām'āktux," kaxīy. Yā' max 'ūyōg hām'āktux. 21 Pa 'āpu hāpxopmā'ax xohix kopit. 'Āpu hāpxop max putyōn hok, xix hāpxopmā'ax max putyōn hok. 22 'Āpu hāpxop kummuk mīy'ax xohix kux.

23 Topa te yūmũ'ā' hōm hāmyiptuk'ax. 'Ātep-tup, pu Topa yāy pu 'āxop xohix pop, yā 'ūyōg xop xe'ēgnāg 'āxop. 'Ātep-tup, pu Topa 'āxop pēnā max, yā 'ākoxuk pēnā', xix 'ākuxa, xix 'āyīn, xayīy 'ōg hāpkummuk mīy'ax pip putup'ah, 'ihā' putpu' nūn putup yūmūg xuxyā Yeyox Kunnix. 24 Hamūn, Topa tep-tup nōm hāpxopmā'ax. Tute 'āxop xānāhā', tu 'āxop tu' xip ka'ok. Topa tep-tup.

25 'Ūkxape xop, 'āpu Topa pu 'ūgmūn 'āktux.

26 'Āpu taknōy xohix pu hām'āktux, hu: "'Ūgmū'āte 'āxop xaxok 'ohnāg." Kaxīy. 'Āpu xape xop yāy kep hā mūy, yā taknōy max putuk.

27 'Āte xa' xak, ha yūmūg xuxyā Yeyox te' xupak, 'āpu nū tappet mōkupix taknōy xohix pu', xix tukūm xohix pu', yā Kunnix kopa kuxa mām xop pu'.

28 Puyā yūmūg xuxya Yeyox Kunnix xa hāmmaxnā'.

Tu ta tu' kux.